

Z dritte uf em Schlitte

Mir sind z'dritte uf em schlitte
Wänd de stroos no abe ritte
Hebbed fescht und los chas goo
Wie das schtübbt wie das schneit
Öper isch scho abe geit
Mümmer z'weite witer go

Nur no zwee dur de schnee
Es wird schnäller immer meh
Es verschlaht eim fascht de schnuuf
Chunnt e ganz e höchi schanze
Ich gseh alles nur no tanze
Denn isch nur no eine druf

Jetzt allei, ooh nei
Muess ich stüüre mit de bei
Ich suus grad wie e pfiil
Ich fahr krumm und ghei um
Und de schlitte, nei wie dumm
Fahrt alei bis as ziel

